

Date – 03/02/2025

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

1. Mizoram leh Manipur inkal pawhna feet 200 a thui Tuivai lei- Bailey Bridge chu Inrinni khan dawh zawh a ni a, enchhin nghal a ni.
2. Thangram Indigenous Peoples' Movement (TIPM) hruaitute chuan Assam a Karimganj district chhunga an chenna ram mel 180 bial chu Assam atanga satthla a Mizorama beh an duh thu an sawi.
3. Naktipa vote vote thlak tur Delhi Assembly inthlan atana campaign hun chu vawiinah a tawp dawn
4. National Games vawi 38-na Uttarakhand-a neih mekah Servicees chuan gold medal 17 la in hma an hruai mek.

<><><>

### TUIVAI BRIDGE

Nikum March ni 13 atanga dawh tan Tuivai lei (Mizoram leh Manipur inkal pawhna feet 200 a thui Bailey Bridge) chu Inrinni khan dawh zawh a ni a, enchhin nghal a ni.

Tuisual Group YMA secretary Pu Lalfakzuala sawi danin Tuivai lei dawh hi Inrinni khan lirthei a tlan thei em tih en chhin a ni a. A enkawltu PWD EE sawm angin Tuisual Group YMA hruaitute chu a hmunah an kal ve a. Lei hi a rinawm tawk em tih enchhinna atan hian Truck lian (Hyva) hman a ni a. Lei hi Ton 20 ai a rit zawhpui loh tur a ni a, PWD Department chuan hei hi zawm vek turin mipui an ngen a ni. Tuivai lei hi Assembly inkhawm tan hma a hawn hman tum a ni a, February ni 2 bawr vela hawn hman beisei a nih thu Pu Lalfakzuala chuan a sawi.

Tuivai lei hi dawh zawh ni tawh mahse mipui hman theih a hawn a la ni lo a. Mizoram leh Manipur lam, lei bul thut kawng hi siam that a la ni lo a, Manipur lam chu tunah hian siam mek a ni. Mizoram lam hi kar leh lamah hna tan tum a ni. Hei bakah hian Chief Minister-in a hawn hma chu PWD lam hian zawh an la remti tih lo a ni.

<><><>

### ASSEMBLY

Tun thla ni 19 atanga tan tur Assembly inkhawm (budget session) atan tun thlengin zawhna a la lut lova, sorkar atangin dan siam tura duan pakhat a lut tawh.

Assembly secretariat atanga thu dawn danin zawhna hi House chhunga chhan chi (starred question) leh ziaka chhan chi (unstarred question) pawh lut a la awm lova. Sorkar hian dan siam tura duan engzat nge putluh tur an neih tih hriat theih a la ni lo chungin tun thlengin dan siam thar tura duan pakhat a

lut tawh ni-in Akashvani Aizawl chuan thu a dawng a. Tun tum assembly inkhawmah hian Prime Minister hlui Dr. Manmohan Singh-a sunna hun buatsaih a ni ang. Puan tawh angin tun tum Mizoram assembly inkhawmah hian March ni 4 khian finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh ang a. Hei hi budget a vawi 2 pharhna tur a ni a, tun tangka kum kallai hi sum harsatna avangin insawhngheh kum (year of consolidation)-ah ZPM sorkar chuan a puang a. Hmalakna lian tham kalpui an tum lo sa a. Kumin budget-ah hian ZPM-in inthlan hma a an lo intiam angte tihpuitlin theihna tur budget danglam hmuh beisei a ni.

March ni 20 thleng assembly inkhawm hi kal chho tura ruahman niin hemi chhung hian tangka tum thar sum ruahman hi pawm hman tura ruahman a ni. Assembly inkhawm tan ni, February ni 19 hian larsap General Vijay Kumar Singh chuan kum khata assembly inkhawm hmasa ber a nih avangin dan panggai angin Assembly chhungah thu a sawi ang.

<><><>

#### ROAD ACCIDENTS

Nikum chhung khan lirthei chetsualna vawi 124 a thleng a, hemi kaihhnawihah hian mi 112 in nunna an chan.

'Road Safety Month' puala thuchah ah Transport Secretary Pu Zosangliana chuan he thu hi sawiin lirthei chesual hi Police-in an chhinchhiah ve loh pawh a awm mai thei niin a sawi a. Lirthei chetsualna lo thleng thin hi mithiamte'n an zirchianna ah chuan za zel a sawm sarh panga hi lirthei khalhtu thiam loh a ni an ti a. A dang za zela 25 chu chhan dang vang a ni, an ti. Kum 5 chhung, kum 2019 leh 2023 inkar khan lirthei chetsualna vawi 547 a thleng a, lirthei chesual avanga nunna chan hi mi 467 an ni. Lirthei chetsualna 289 hi lirthei khalhtu fimkhur loh vang a ni a, hemi avang hian mi 253-in nunna an chan phah a. Hemi hun chhung vek hian rui chung a lirthei khalh vangin lirthei chetsualna vawi 85 a thleng a, nunna chan mi 69 an awm. Mahni tlan lohna lam tura tlan (wrong side driving) avangin chetsualna vawi 44 a thleng a, mi 28-in an thih phah a. Lirthei khalh laia mobile hman vangin lirthei chetsualna vawi 5 a thleng a, mi 5-in an tih phah a ni.

Kumina 'Road Safety Week' thupui chu "Fimkhur leh him takin lirthei khalh thin ang che," tih a ni.

<><><>

#### THANGRAM

Thangram Indigenous Peoples' Movement (TIPM) hruaitute chuan Assam a Karimganj district chhunga an chenna ram mel 180 bial chu Assam atanga sathla a Mizorama beh an duh thu an sawi.

TIPM hruaitu Pu K. Vana Chorei chuan tun hnai khan Mizoram chief minister Pu Lalduhomarawn hmu-in Mizorama beh a duhna kawngah a tanpuina an dil tih a sawi a. Chief minister pawhin a puihna an mamawhna-ah chuan theihtawp chhuahpui a lo tiam niin a sawi a. Hmakhawsang atanga Mizote'n an lo luah tawh Thangram bialah Mizo 32,000 bawr vel an awm niin Pu K. Vana Chorei chuan a sawi a. An chenna bialah hian Mizo hnam hrang hrang - Hrangkhawl, Sakachep, Molsom, Chorei leh Ranglong te an awm a. An luah chin ram mel 180 bial ni thin kha tunah chuan an vela hnam lian zawkte'n

an nek nasat avangin mel 140 bial vel chauh a nih tawh a rin thu a sawi a. An hnam ziarang leh sakhaw him zawk na'n Mizoram a beh chu tih makmawh a nih thu leh hemi chungchangah hian Prime Minister hnenah lehkha thehlut tawhin Assam sorkar hruaitute nen pawh vawi duai lo an inbe tawh niin a sawi a ni.

Pu K. Vana Chorei chuan British ho khan 'Old Kuki' ti a an vuah thu a sawi a, hriat hlat theih berah kum 1490 khan helai hmunah hian Mizote hi an lo inbengbel tawh niin a sawi bawk. Mizorama beh an duh thu hi kum 2020 atang khan nasa takin an lo aupui tawh niin a sawi a ni.

<><><>

ASF FREE

Kumin chhungin African Swine Fever (ASF) vawk pulhri puang avangin vawk thi leh suat a la awm lova, ni 41 chhung a zawnin vawk thi leh suat a awm tawh lo.

Vety department hotute'n an sawi danin kumin kum bul January ni 1 atanga nimin thleng, ni 33 chhung hian ASF vawk pulhri avanga vawk thi leh vawk damlo suat a la awm lo a. Nikum December ni 24 atang khan vawk thi leh suat a awm tawh loh avangin ni 41 chhung chu a zawnin vawk thi leh suat a awm tawh lo a ni. ASF vawk pulhri hi a reh rih a ngaih a nih lai-in tun thla emaw March thla emaw a khua a lum chhoh leh a, ruahtui tlem a tlak chuan ASF vawk pulhri hi la puang leh thut thei a nih thu an sawi a. Kum 2021 kum bul lam atang khan he vawk pulhri hian Mizoram a chen chilh tawhah an ngai a ni.

Mizoram hi ASF vawk pulhri hian kum 2021 bul lam atang khan a chen chilh tawh a, kumtin a puang ta ziah a. Kum 2021 March ni 21 a Lunglei district a Lungsen khua a ASF vawk pulhri a leng tih hmuhchhuah a nih atanga nikum kum tawp lam thleng khan Mizoramah vawk nuai 1, sing 1, sang 1 leh 434 thi leh suat a awm tawh a. Vawk thi zawng zawng hi 62,761 a ni a, vawk 49,267 suat a ni tawh bawk.

<><><>

EMCC

State election commission (SEC) chuan PWD Minister Pu Vanlalhlana leh Labour, Employment, skill development & entrepreneurship (LESDE) minister Pu Lalnghinglova Hmar te chu inthlan puan tawh hnu a tih loh tur ti a puh an nihna sawifiah turin a ti.

MNF party-in an hekna tlawhchhanin Minister pahnihte February ni 12 a village council (VC) leh local council (LC) inthlan lo awm tura election model code of conduct bawhchhia a an puhna hi Aizawl district election officer chuan election observer hnenah thawnin ani hian SEC hnenah a pe chhawng leh a ni. PWD Minister Pu Vanlalhlana hi a sorkar pisa chhung ngei atanga video hmanga Durtlanga rorellai ZPM local council candidate te vote tura ngenin chu chu social media a thehdarha puh a ni a. Pu Lalnghinglova Hmar pawh a bial Aizawl West-2 huam chhunga local council inthlanna a ZPM candidate te tana beihpui a thlakna a inthlan puan hnu-a tih phal loh ti-ah puh a ni bawk a. Minister pahnihte hi vawiin aia tlai lova an insawifiahna SEC a thehlut tura hriattir an ni.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



## DELHI ELECTION

Naktipa vote vote thlak tur Delhi Assembly inthlan atana campaign hun chu vawiinah a tawp dawn. Campaign nan hun tlemte chauh a awm tawh avangin Political Party hruaituten ngawrh takin tan an la a. BJP hruaitu senior leh Prime Minister Narendra Modia chuan nimin khan RK Puram ah thu a sawi a. AAP sarwkar chu demin an hlauthawngin darkar tin policy thar an puang a ti a. Kum 11 liamta chhung kha awmze nei loin an hmang ral tih sawiin hmasawna hna thawhloh an ngah hle a ni a ti bawk.

PM Modia bakah hian BJP hruaitu senior leh Union Minister Ashwini Vaishnaw te, Rajnath Singh-a ten Rajinder Nagar, Chadni Chowk leh Laxmi Nagar-ah te hun an hmang a ni.

Hetihlai hian AAP Convenor Arvind Kejriwal chuan Chief Election Commissioner hnenah lehkha thawnin an party worker te BJP worker ten an bei niin a puh a.

Congress President Mallikarjun Kharge chuan nimin khan Mustafabad bialah thu a sawi a. Rahul Gandhi leh Priyanka Gandhi te tapwhin hmun hrang hrangah campaign-in hun an hmang a ni.

Puan tawh angina Delhi Assembly ah hian seat 70 a awm a. Vote tla te hi tunkar Inrinni February ni 8 ah chhiar a ni ang.



## NATIONAL GAMES

National Games vawi 38-na Uttarakhand-a neih mekah Servicees chuan gold medal 17 la in hma an hruai mek. Karnataka chuan dawtin gold medal 15 an la tawh a ni. National Games ah hian infiammiten record thar engemawzat an siam chho zel a. Maharashtra atangin Vaishav Shahaji Thakur chuan mipa kg 102 weightlifting-ah national record siamin snatch event ah kg 160 a chawi a. Madhya Pradesh atanign Aashi Chouksey chuan hmeichhia 50m Rifle 3 Positions ah national record siam bawkin point 598 a kapchhuak a ni.

National Games-a a hmasa ber turin Yoga Competition ah Chhatisgarh leh Uttar Pradesh chuan gold medal an la a ni.

